

民國六年首夏之日

傷寒經方圖訣串解

王士珍外史題



南京中医药大学图书馆版权所有

序

傷寒醫訣串解者長樂陳修園先生晚年所編集也惜六篇之中尚缺其一以其未成書故不及付梓其門徒猶子陳道著有盧扁風閩之名醫也既能學先生之學又能承先生之志日嘗手披而秘藏之復體會其遺意而敬續一篇以補其缺合成六篇而篇帙遂成茲修園古矣其猶子道著亦古矣閩中林子壽萱專心衡世於舊書肆中檢得修園先生註解葛可久十藥神書一卷購而珍存之并恐此二種沒而不彰因細加警校韻而錄之欲與兩先生傳名兼以傳世值余奉命巡撫全閩因舊疾復起探知林子精於療治常勞診視論及閩中名醫林子以陳修園陳道著兩先生對敬以修園先生所著南雅堂十一種醫書見示且余本善病人也又耳熟是書久矣適林子復以傷寒醫訣串解手錄一通乞序於余余不敏每兢兢官守尚恐才不足以經世何暇論及衡世然串解寔補傷寒淺註所未備不可以無傳若再附以十藥神書註解合而刻之庶可以作岐黃家秘本矣今之術岐黃者果能默會精審互相參校其裨益良不淺也姑就林子所述其緣起為之弁數語於簡端云爾

咸豐丙辰秋九月望後三日福建巡撫呂佺孫書



序

彙集傷寒淺註凡三百九十七法依法條晰期於明白易曉而又慮學者未能融會貫通而得其要旨也不揣固陋復為綜貫衍繹名曰傷寒醫訣串解其於疑似細微之處抉剔詳辨頗費苦心脩園老矣敢謂於此道三折肱然有志之士誠能即此紬繹其端緒推尋其綱領而不眩於似是而未必非活國活人之一助也

閩長樂陳念祖修園識

傷寒醫訣串解目錄

卷之一

太陽篇

卷之二

陽明篇

卷之三

少陽篇

卷之四

太陰篇

卷之五

少陰篇

卷之六

厥陰篇



南京中医药大学图书馆藏

傷寒醫訣串解卷一

閩長樂陳念祖修園著

太陽篇第一

太陽為寒水之經主一身之表

何謂太陽經症曰頭痛項強發熱惡寒是也有虛邪實邪之辨脈緩自汗惡風為虛邪宜桂枝湯如八九日過經不解如瘧狀面熱身瘥以其不得小汗故也宜桂枝湯麻黃各半湯因前此未汗不得不發其汗因日數頗久故小發其汗如服桂枝湯大汗出後形如瘧日再發者以餘邪未盡故也宜桂枝二麻黃一湯大汗之後不得再行大汗之法而餘邪未盡不得不從汗而竭之但藥品宜輕耳脈浮緊無汗惡寒為實邪宜麻黃湯如無汗煩躁者加石膏姜棗名大青龍湯如乾嘔而咳去杏仁加五味乾姜半夏細辛芍藥名為小青龍湯此二湯即麻黃湯之加減總不出麻黃湯之範圍此二法治表中之表也

何謂太陽府症曰表邪不去必入於裏膀胱為表中之裏也有蓄水蓄血之辨太陽症其人口渴煩躁不得眠脈浮小便不利水入即吐為膀胱蓄水症宜五苓散太陽症其人如狂小腹鞭滿小便自利脈沉為膀胱蓄血症宜桃仁承氣湯此二法治表中之裏也何謂太陽變症曰汗下失宜從陰從陽之不一也不應下而下之續得下利清穀身疼痛宜四逆湯以救清穀之裏又以桂枝湯以救身疼痛之表病發熱頭痛脈反沈若不

瘥身體疼痛當救其裏宜四逆湯 大汗大下利而厥冷者四逆湯主之 太陽病發汗太過遂漏不止其人惡風小便難四肢微急難以屈伸桂枝加附子湯主之 太陽病發

汗太過動其榮血而衛邪反內伏其人仍發熱心下悸頭眩身瞤動振振欲僻地者真武湯主之 以上言汗下太過傷正而虛其陽陽虛則從少陰陰化之症多以太陽少陰為

表裏也陽盛於內誤服桂枝湯大汗出後大煩大渴不解脈洪大者白虎加人參湯主之 傷寒若吐若下後七八日不解熱結在裏表裏俱熱時時惡風大渴舌上乾燥而煩欲

飲水數升者白虎加人參湯主之 傷寒不大便六七日為裏症頭痛發熱為表症外不解由於內不通也下之裏和而表自解矣與承氣湯 病人煩熱汗出則解又如瘧狀日

晡所發熱屬陽明也脈寔者宜下之與大承氣湯脈虛者宜發汗與桂枝湯發汗後惡寒者虛故也不惡寒但熱者寔也當和胃氣與調胃承氣湯 太陽病未解脈陰陽俱停停

者沈滯不起也陰陽尺寸也先振慄汗出乃解但陽脈微者先汗而解但陰脈微者下之而解若欲下之宜調胃承氣湯按此脈微即上文脈停也 以上言汗下失宜熱熾而傷

其陰陰傷則從陽明陽化之症多以太陽陽明遞相傳也 何謂發汗利水為治太陽兩大門曰邪傷太陽病在寒水之經驅其水氣以外出則為汗

逐其水氣以下出後為蓄涎蓄水前為小便長 太陽為寒水之經邪之初傷必須發汗麻黃湯發皮膚之汗桂枝湯發經絡之汗葛根湯發肌肉之汗小青龍湯發心下之汗

大青龍湯發其內擾胸中之陽氣而為汗。此發汗之五法也。若汗之而不能盡者。則為水。水在心下。乾嘔而咳。宜小青龍湯。發熱而煩渴欲飲水。水入即吐。名曰水逆。宜五苓散。汗後心下痞硬。乾噎食臭。脇下有水氣。腹中雷鳴下利者。病勢在腹中。而病根猶在心下。宜生姜瀉心湯。此水氣在上焦。在上者汗而散之也。若妄下之後。自心上至小腹硬滿而痛不可近。水與氣所結脈遲。名大結胸。宜大陷胸湯。若項亦強。如柔痙之狀。宜大陷胸丸。蓋病勢連於下者。主以湯。病勢連於上者。主以丸。是也。若其結止在心下。按之始痛。脈浮滑。名小結胸。邪氣尚在脈絡。宜小陷胸湯。若無熱症。名寒寔結胸。宜三物白散。若心下痞硬滿。引脇下痛。乾嘔短氣。汗出不惡寒。三焦升降之氣阻格難通。宜十棗湯。此水氣在中焦。中滿瀉之於內也。若頭痛項強。翕翕發熱無汗。心下滿微痛。小便不利者。因膀胱之水不行。營衛不調。不能作汗。宜以桂枝去桂加苓朮湯治之。是水氣在下焦。在下者引而竭之是也。

內經云。太陽之上寒氣治之。所謂本也。本之下中之見也。見之下。氣之標也。又曰。太陽從本從標。又曰。太陽為開。又熱病論曰。傷寒一日。巨陽受之。故頭項痛。腰脊強。

傷寒論云。太陽之為病。脈浮。頭項強痛而惡寒。又云。太陽病。發熱汗出。惡風。脈緩者。名為中風。又云。太陽中風。陽浮而陰弱。陽浮者。熱自發。陰弱者。汗出。晉晉惡寒。浙浙惡風。翕翕發熱。鼻鳴乾嘔者。桂枝湯主之。又云。太陽病。頭痛發熱。身疼腰痛。骨節疼痛。惡風無汗而

喘者麻黃湯主之。太陽主一身之表六經中最外一層故表病俱屬太陽俱有表中之表病在肌腠則有汗宜桂枝湯病在膚表則無汗宜麻黃湯兩法用之得當一劑可愈。又有脈微惡寒面色反有熱色而身癢是邪欲出而未得遽出必得小汗而解宜桂枝麻黃各半湯。又有服桂枝湯大汗出後形如癰日再發是肌病兼見表病宜桂枝二麻黃一湯是二方即上兩法之佐也然二方能治肌腠膚表之病不能治經輸之病太陽之經輸在背內經云邪入於輸腰背乃強論中以項背強几几無汗惡風用葛根湯項背強几几反汗出惡風用桂枝加葛根湯二方亦上兩法之佐也但兩法俱是太陽本寒之症故方中取用辛熱之品若太陽標熱之症自汗症不得運用桂枝湯宜用芍藥甘草湯以各症與桂枝症無異惟腳掣急獨異是太陽之標熱合少陰之本熱之病也無汗症不得用麻黃湯宜用麻杏甘膏湯以各症與麻黃証相似惟初起口渴發熱而無惡寒或發汗已身灼熱不似論雖另別為溫病風溫之症然節首冠以太陽病三字蓋指太陽之標熱而言明明為一隅之舉不讀內經不能解也其云桂枝二越婢一湯為標內陷於裏陰而化熱故熱多寒少而脈微弱論曰無陽言無在表之陽也論曰不可發汗言不可發太陽之表汗也故用此湯直從裏陰而外越之也此又可借用為上兩法之佐也然太陽為表而亦有裏膀腕即太陽之裏也如太陽症發熱無汗而心下滿微痛小便不利不宜取汗宜桂枝去桂加茯苓白朮湯令小便利則愈又有發汗後

脈浮。小便不利。微熱消渴之症。又有中風發熱六七日不解而煩。為表症。渴欲飲水。為裏症。論名曰表裏症。水入則吐。論名曰水逆證。兩證俱宜五苓散。多飲煖水。以出汗。此表中裏症之治法也。至若大青龍湯。因脈浮緊。身疼痛。不汗出而煩躁。為麻黃証之重者。而設小青龍湯。因表不解。水停心下。而咳噎。變大青龍湯之大寒大散。而為發汗利水之劑。即是麻黃湯之加減。總不出麻黃湯之範圍。即若桂枝去芍藥湯。因桂枝症候下脈促。胸滿。而設桂枝去芍藥加附子湯。又因前症。脈不見促。而見微身復惡寒。而設桂枝加附子湯。因發汗太過。遂漏不止。惡風。小便難。四肢微急。難以屈伸。而設此。因大汗以亡陽。因亡陽以脫液。取附子以因少陰之陽。固陽即所以止汗。救液也。推之汗後病已解。復煩及桂枝病初服。桂枝湯反煩不解。刺風池風府。却再與桂枝湯。則愈。其用甚廣。總不出於桂枝証。頭痛發熱。汗出惡風。八個字之外。須知太陽治法不外桂枝麻黃二湯。服麻黃湯之後。復有再服桂枝湯之法。服桂枝湯之後。並無再服麻黃湯之法。更須知太陽為寒水之經。病本寒者。較多病標熱者。較少。若標本兼病。亦以熱多寒少為欲愈。治傷寒者。當知所重矣。此論太陽病。以桂枝麻黃二湯為主。一線到底。千古註家。無此明晰。外此亦即二湯之更進一步。非離乎二湯之外。而立法也。太陽主一身最外一層。邪從外來。須要驅之使出。服上二湯。尚不能出。或留本經。或侵他經。必藉少陽之樞轉。以達太陽之氣。而外出也。故小柴胡湯為太陽篇之要劑。今人不知擅改為

少陽主方失之遠矣故無論桂枝證麻黃證若值三日九日十五日少陽主氣之期必藉其樞轉而出或又見往來寒熱樞不轉現出開闔不利之象胸脇若滿胸乃太陽出入之部脇為少陽所主之樞默默不欲食心煩默默必神機內鬱而心煩喜嘔不欲食必胃氣不和而喜嘔嘔則逆氣少疏故喜也或涉於心而不涉於胃則胸中煩而不嘔或涉於陽明之燥氣則渴或涉於太陰之脾氣則腹中痛或涉於厥陰之肝氣則脇下痞硬或涉於少陰之腎氣則心下悸而小便不利或太陽藉少陰之樞轉已有向外之勢則不渴身有微熱或涉於太陰之肺氣則咳者皆以小柴胡為主而隨其或然之證加減而治之若太陽病過經不解先與小柴胡湯嘔不止心下急鬱鬱微煩與大柴胡湯下之以平其胃則愈凡太陽篇有柴胡之方或因其病象有從樞達之而以柴胡達之抑因其久鬱未解之邪而以柴胡可以從樞達之無非乘機利導之法亦即麻黃桂枝二湯進一步之佐也推而言之太陽之氣外行於胸脇不能外而於病內實則為大小陷胸湯證虛則為諸瀉心湯證且太陽之氣上行而至於頭下行而歸於腹不能上而病於下從背而下結於胸室則為桃仁承氣湯証從胸而下瘀於胞室則為抵當湯証何莫非桂枝麻黃二湯應用不用或用之失法所致哉蓋太陽經正治法不過二十餘條而已其他則皆權變法幹旋法也假使治傷寒者審其脈之或緩或緊辨其症之有汗無汗則從而汗之解之如桂枝麻黃等法則邪却而病除矣其或合陽明或合少陽

或合三陽者則從而解之清之如葛根湯治太陽陽明合病下利葛根加半夏湯治合病不下利而但嘔者黃芩湯治太陽少陽合病而自利黃芩加半夏生薑湯治合病而嘔者如白虎湯治三陽合病其云腹滿者為陽明經熱合於前也其云身重者為太陽經熱合於後也其云難以轉側者為少陽經熱合於側也其云口不仁而面赤者熱合少陽之府也其云譫語者熱合陽明之府也其云遺尿者熱合太陽之府也既審其為三陽之合又必得自汗出之的證而後用白虎湯之的方斯邪分而病解此為正治之法顧人氣體有虛實之殊藏府有陰陽之異或素有痰飲痞氣以及咽燥淋瘡汗齇之疾或適當房屋金刃產後亡血之餘是雖同為傷寒之候不得竟用麻桂之法矣於是

有旋覆代赭石湯治傷寒汗吐下解後心下痞鞭噫氣不除是胃氣弱而未和痰氣動而上逆之症自茯苓桂枝白朮甘草湯治吐下後邪解而為飲發之證金匱云脇間支飲其人嘔滿心下痞堅又云心下又痰飲胸脇支滿目眩又云其人振振身瞤劇者必有伏飲其云發汗則動經者言無邪可發而反動其經氣也有承氣湯治傷寒六七日不大便頭痛有熱必衄以陽熱太重以此湯承在上之熱氣而使之下也有小建中湯以治傷寒二三日心悸而煩補中氣以生心血有炙甘草湯治脈結代心動悸啟腎陰以行於脈道有四逆湯治發熱頭痛脈反沉身體疼痛扶腎陽以救其虛陷是為權變之法而用桂枝麻黃等法又不能必其無過與不及之弊或汗出不徹而邪不外散則

有傳變他經。及發黃蓄血之病。如中風以火劫汗。則兩陽熏灼。其身發黃。陽盛則欲衄。陰虛則小便難。甚則見發噦譫語。捻衣摸床。諸危症。服藥得小便利者。方可治之。如桂枝證外不解。而熱結膀胱。其人如狂。血得自下。乃愈。若小腹急結。有桃仁承氣湯之輕攻法。如麻黃證表不解。脈微而沉。其人狂。其邪反不結於胸。而直下於少腹。而鞭滿。為裏熱在裏。又身黃。脈沉結。小便自利。不為水。而為血。其血不能自下。必攻而始下。又有抵當湯之峻攻法也。汗或出過多。而并傷其陽氣。則有振振擗地。肉瞤筋惕。為真武湯之證。有發汗後。血液內亡。身疼痛。脈沉遲者。為桂枝加芍藥生姜人參新加湯證。有發汗過多。虛其氣。其人叉手冒心。喜按者。為桂枝甘草湯證。有發汗後。虛其腎氣。臍下悸。欲作奔豚。為茯苓桂枝甘草大棗湯證。有發汗後。傷其中氣。不能運行升降。而腹脹滿。為厚朴生薑甘草人參半夏湯證。有發汗後。反惡寒。陰陽兩虛。為芍藥甘草附子湯證。且有更發汗。小發汗。論中有論而無方。亦可以意會之。是為斡旋之法。學者宜究心焉。

傷寒醫訣串解卷二

陽明篇第二

陽明主裏外候
肌肉內候胃中

何謂陽明經症。曰。身熱。目痛。鼻乾。不得眠。反惡熱是也。有未罷太陽。已罷太陽之辨。若兼見頭痛惡寒。是太陽症未罷。自汗脈緩。宜桂枝湯。項背強几几。桂枝加葛根湯主之。無汗脈浮。宜麻黃湯。項背強几几。葛根湯主之。若無頭痛惡寒。但見壯熱。口渴。是已

罷太陽為陽明經之本症宜白虎湯主之

何謂陽明腑症曰潮熱譫語手足腋下澹然汗出腹滿大便鞭是也有太陽陽明少陽陽明正陽陽明之辨本太陽症治之失法亡其津液致太陽之熱乘胃燥而轉屬陽明其症小便數大便硬傷寒論謂之脾約宜麻仁丸以上言太陽陽明之症也本少陽病治之失法亡其津液致少陽之邪乘胃燥而轉屬陽明為大便結燥傷寒論謂為大便難以蜜煎胆汁導之以上言少陽陽明之症也病人陽氣素盛或有宿食外邪傳入遂歸於胃腑傷寒論謂為胃家寔宜以三承氣湯下之以上言正陽陽明之症也陽明在經未離太陽宜汗之既離太陽宜清之在腑審其輕重宜下之若在經絡之界汗之不可清之不可下之不可宜用吐法柯韻伯云除胃寔症其餘如虛熱咽乾口乾口苦舌胎腹滿煩燥不得卧消渴而小便不利凡在胃之外者悉是陽明表症仲景製汗劑是開太陽表邪之出路製吐劑是引陽明表邪之出路使心腹之濁邪上出於口一吐則心腹得舒表裏之煩熱悉除矣煩熱既除則胃外清自不致胃中之寔所以為陽明解表之聖劑

內經云陽明之上燥氣治之所謂本也本之下中之見也見之下氣之標也又曰陽明不從標本從乎中見從中見者以中氣為化也又曰陽明為閤又熱病論曰二日陽明受之陽明主肉其脈俠鼻絡於目故身熱目痛而鼻乾不得卧也傷寒多發熱而此獨身熱者

蓋陽明主肌肉身熱尤甚也。邪熱在胃則煩故不得舒卧也。

傷寒論云。問曰。病有太陽陽明。有正陽陽明。有少陽陽明。何謂也。答曰。太陽陽明者。脾約是也。本太陽病不解。太陽之標熱。合陽明之燥熱。以致脾之津液。為其所灼而窮約。正陽陽明者。胃家寔是也。燥為陽明之本氣。燥氣太過。無中見濕土之化。而寔少陽陽明者。發汗利小便。胃中燥煩而寔。大便難是也。少陽之上。相火治之。少陽病誤發汗。誤利小便。則津液竭。而相火熾盛。胃中燥寔。而大便難矣。

陽明之為病。胃家寔也。言陽明病。雖有三者之分。而其為胃家寔則一也。此節為陽明病之提綱。沈堯封云。胃家寔言以手按胃中寔硬也。柯韻伯云。不大便利便是胃家寔。尤在潛云。凡傷寒腹滿。便閉。潮熱。轉失氣。手足濇濇。汗出等證。皆是胃家寔。三說不同。均存之以互參。問曰。陽明外証云何。答曰。身熱。肌肉蒸蒸然。熱達於外。與太陽表熱不同。汗自出。熱氣內盛。濇濇然。汗溢於外。與太陽之自汗不同。不惡寒。外寒已解。反惡熱。裏熱已盛也。沈堯封云。此節合上一節。為陽明証。一內一外之提綱。只因有胃家寔之病根。即現盛熱汗出之病證。不惡寒。反惡熱之病情。必內外俱備。方是陽明之的證。

陽明本燥。而標陽。若不得中見。太陰之濕。化其燥。氣陽熱太盛。則為胃家寔之病。故仲景以胃家寔為此證提綱。雖有太陽陽明。正陽陽明。少陽陽明之分。而其為胃家寔則一也。且更合之外證。自熱。汗自出。不惡寒。反惡熱。便知胃家寔。證有諸中。而見諸外。愈

可定其為真陽明也。其證雖有在表宜從汗解者。須知汗出多。脈微。宜桂枝湯。無汗而喘。脈浮。宜麻黃湯。二者俱太陽證。而屬之陽明者。以其不頭痛項強故也。若惡寒已罷。二方必不可用。且陽明提綱。重在裏證。所以論中以此條別作一章也。至於陽明本証。有自受証。有轉屬証。有邪盛証。有正虛証。有能食不能食証。有寒冷燥熱証。有從樞從開証。有名同而寔異。源一而流分。證治之者。不得其緒。如治絲而棼之也。何謂自受病。起於陽明。本經自為之病。其外證身熱。汗自出不惡寒。反惡熱。為陽明病。自內達外之表證。其有得之一日。不待解散。而二日惡寒自罷。即自汗出而發熱。為風寒入於陽明。本經之表證。此陽明自受之大畧也。何謂轉屬。凡太陽病。過汗亡其津液。致胃中乾燥。而轉屬者固多。亦有本太陽病。初得時發汗不徹。太陽標熱之氣。不能隨汗而泄。即與陽明燥氣。混為一家。而轉屬者。亦有發熱無汗。嘔不能食。其即伏胃不和之病机。不因發汗。而自濺濺然汗出。為轉屬者。更有誤下而轉屬者。此陽明病轉屬之大略也。何以謂正虛。本篇第十六節云。陽明病。不能食。胃中虛冷。攻其熱必噦。言胃腑之虛也。第十七節云。脈遲。食難用飽。飽則微煩。頭眩。必小便利。此欲作穀瘵。雖下之。腹滿如故。此言經脈之虛也。第十八節云。無汗身如蟲行皮中狀者。虛故也。此言皮腠之虛也。論雖無方。大抵不外溫補之法。第二十六節云。傷寒嘔多。雖有陽明證。不可攻之。以嘔則胃氣虛。雖有陽明定熱之症。不可誤攻。而致死。此言胃氣虛不可下也。第二十七節云。心下鞭。

滿者不可攻之。攻之利遂不止者死。論止言心下而不及腹。止言鞭滿而不兼痛。且心下為陽明之膈。膈寔者腹必虛。腹中之虛氣閉於陽明之部。若誤攻之。則穀氣竭而不利死矣。此言真虛假寔者不可下也。第十八節云。面合赤色不可攻之。攻之必發熱。黃。小便不利。以陽明之脈上循於面。不知熏解之法而誤攻之。則變為發熱。色黃。小便不利等證。此言外寔內虛不可下也。須知陽明證雖以胃家寔為提綱。惟不得中見太陰之濕化。陽明愈寔而中見愈虛。前此註家不知從此發揮以致患陽明證者以白虎承氣枉死幾十萬人。也。何謂邪寔論中陽明府證皆熱邪為病。然熱邪散漫於內外。大渴大汗宜用白虎。遂熱而生液熱邪結聚於腸胃潮熱譫語宜用承氣。逐熱而蕩寔。二方均為陽明府病而設。誤用之便致殺人。第四十一節。三陽合病。末一句云。若自汗出者主用白虎湯。可以得其大要。而三承氣湯各有所主。陽明證不吐不下。雖胃氣不虛而胃絡上通於心。可因其心煩一證而知其胃氣不和。可與調胃承氣湯。二十九節已有明文也。至於大承氣證於其脈遲則知其陽邪盡入於裏陰。又於其汗出不惡寒身重短氣腹滿而喘五者之中更取出裏證最確者曰。不惡寒而潮熱。言熱邪盡入於胃。必變身熱為潮熱也。且於裏證中而知其大便鞭之最確者曰。手足濇然而汗出。言胃主四肢若大便已鞭者必通身熱蒸之汗自斂而變為手足濇然之汗。方為大承氣之證。否則不過燥屎不行。祇為小承氣證耳。然而小承氣亦不可以輕用也。不大便六

七日欲知其有燥屎與否。少與小承氣湯試之。湯入腹中而轉失氣者可再用之。若不轉失氣者。此為胃氣之虛。初鞭後溏。必致不能食而脹滿。不能飲而作噦矣。論中二十九節。三十節。三十一節。當潛心體玩。至於謔語。諸家皆謂邪寔然。論中三十二節。有寔則謔語。虛則鄭聲之分。本節直視為精氣已奪。喘滿為脾肺不交。下利為脾腎不固。此皆謔語。虛脫之死候。其餘自三十三節至四十三節。寔邪固多。而亦不可概認為寔邪之為病也。張隱菴云。凡謔語。乃心主神氣內虛。言主於心。非關於胃。胃燥謔語。而用承氣。乃胃絡不能上通於心。胃氣清而脈絡能通之。義仲景示以法。不可泥於法也。何謂能食不能食。若中風則能食。以風能鼓動陽明之氣也。若中寒則不能食。以寒能拒閉陽明之氣也。中寒之旨。詳於第十九節。中風之旨。詳於第二十節。意以寒為陰邪而下。行。故無汗而小便利。風為陽邪而上。行。故不惡寒而頭眩。寒則嘔不能食。風則能食。寒則頭痛。風則咽痛。此陽明有風寒之別也。何謂寒冷燥熱之分。本篇第四十四節云。脈浮而遲。虛寒之脈也。其云表熱者。陽明戊土不能下合少陰癸水。而獨主乎外也。其云裏寒者。少陰癸水不能上合陽明戊土。而獨主乎內也。其云下利清穀者。戊癸不合而下焦生陽不升也。以四逆湯為主治。第四十五節云。胃中虛冷者。言中焦土氣虛冷也。其云不能食者。中焦虛冷。失其消穀之用也。其云飲水則噦者。兩寒相得而為噦也。論中未出方而理中湯堪為主治。推之第六十節云。食穀欲嘔者。屬陽明也。吳茱萸湯主